

Oz ha Pigo anniversari: Precis avant in onn è il verm naschi

Tge fiss La Quotidiana senza ses «cartoon»

DAD AUGUSTIN BEELI

■ «Mira, quels pauperets han fom. – Na quai è la Ligia Grischa»: Quai è stà in dals 260 discurs che Pigo, il verm original, ha manà durant il davos onn cun lecturas e lecturs da La Quotidiana. Nus tirain bilanza. Cun ses dus dentets sumeglia el in pau a la cucumera da la reclama da «chirat». Insatge sumegliant n'avevan ins mai vis avant en ina giasetta. La Quotidiana ha gi l'onur da porscher in dachasa al verm Pigo. «Jau gratulesch, Pigo. Oz na dastgas ti lu betg mangiar memia blera turta. I fiss donn sche ti schlupassess e na savesses betg pli cumparair en nossa giasetta.» En sesez nun è quai nagin problem. Pigo è gia

schluppà differentas giadas dapi ils 4 d'avust 1997, e l'auter di ès el adina puspe renaschi, saja sco violonist, sco ortulan ni simpla-main sco charin Pigo cun sia bucca largia ed ils dus dentets.

En nagin'otra giasetta


A bleras lecturas ed a blers lecturs è quest animalet cun ses discurs creschi a cor. Sia logica seriusa e main seriusa, sias piztgadas, ses reclamar e crititgar, normal e pli pauc normal, ses temas actuals ed eterns, quai tutga tier La Quotidiana sco las provisiuns da l'aura. Clar, ch'i fiss pussaivel da remplazzar el cun auters cartoons. Tge «collegas» ha Pigo? Ah, gea, Hägar, il sgrischaivel el «Blick» ed en la «Südstschweiz».

I dà era auters, per exempel il renomà Mordillo, il Closchi en l'Arena Alva, ni Garfiel, il giat grass. Che Mutts, l'uschè pitschen dal «Tagblatt», nun è nagina concorrenza per nos Pigo è tuttina clar. Uschia in original nun ha nagin'otra giasetta. Il charin animal senza chombas cun ils eglg characteristics ha adina la lieunga che penda or da bucca.

«Mister Pigo»

Tge experientschas ha il «bab» da Pigo fatg el decurs da quest onn passà cun ses animalet? «Las reacziuns ed ils resuns ein positivs», di *Conrad Cavigilli*. Da gliend ch'enconuscha el vegn el plegendà cun «mister Pigo». Il geolog diplomà e graficher da hobi ha sulettamain breggia che ses Pigo discorra betg sursilvan. Igl è dentant in fatg che Pigo vul sa drizzar a tuts Rumantschs e betg mo ad ina part da quels.

L'onn passà ha il charin verm pri posiziun tar blers temas spinus. I sa chapescha da sasez ch'el ha laschè crescher las flurs en ses iert cun Viagra. Pigo ha era gi la gagliardia da mussar color davant politichers ed administraziun federala. En fatgs da bellezza è il verm mintgatant in pau crudaivel cun sia dunna. Saja pertutgant il «lifen» ni cun «silicon», adina na lascha Pigo betg quiet sia consorta. Inagiada ha «noss» Pigo, sunter ch'el aveva legi La Quotidiana, schizunt stuvi chajar bustabs. Sco quai che Conrad Cavigilli ha tradi, ha el planisà da dar ora in cudesch da ses verm.



Pigo, il verm, ha mintga di, dapi exact in onn, la bucca averta sin la davosa pagina da La Quotidiana.